

**Ebazpena: R 74/2023**

**Espedientea: 10/2019**

Vitoria-Gasteiz, 2023ko ekainaren 23a.

Euskal Autonomia Erkidegoarekiko Ekonomia Itunaren Arbitraje Batzordeak, Violeta Ruiz Almendral batzordeburu andreak eta Sofía Arana Landín batzordekide andreak eta Javier Muguruza Arrese batzordekide jaunak osatutakoak, honako hau erabaki du:

## **ERABAKIA**

Zerga Administrazioako Estatu Agentziak (aurrerantzean, ZAEA) Gipuzkoako Foru Aldundiaren (aurrerantzean, GFA) aurka planteatutako gatazkari buruzkoa, zeinaren helburua baita zehaztea nork duen eskumena TTUSL(aurrerantzean, TTUSL) sozietateak 2012ko lehen hiru hiruhilekoetan egindako lan pertsonalaren gaineko atxikipenak ordainarazteko; zehazki, auzia zerbitzuak lurralde erkidean eskusiboki eman zituzten langile jakin batzuen lan-atxikipenen ingurukoa da. Gatazka hori Arbitraje Batzorde honetan izapidetzen ari da, 10/2019 espediente-zenbakiarekin.

## **I. AURREKARIAK**

1.- TTUSL egoitza fiskala Gipuzkoan duen sozietate bat da, salgaiak errepidez garraiatzen dituen eta zerbitzuak Espainia osoan eta atzerrian ematen dituen; hori bai, lantoki bakarra du, Gipuzkoan bertan kokatuta dagoena.

Enpresaren jarduera-adar nagusiak honako hauek dira: garraio berezia, parke eolikoetarako materialaren garraioa, elementu prefabrikatuen garraioa, elementu modular autopropulsatuen bidezko garraioa eta garraio konbentzionala.

2.- ZAEAk, 2015eko abenduaren 9an, egiaztapen-jarduketak abiatu zituen, zehazki, zerbitzuak lurralde erkidean eskusiboki eman zituzten langile jakin batzuen lan pertsonalaren gaineko atxikipenak ordainarazteko eskumenarekin lotuta; atxikipenon diru-sarrerak GFari egin zitzaizkion.

2016ko urriaren 13an txosten bati hasiera eman zitzaion, 2012-2014 urteei dagozkien kopuruak kalkulatzeko.

3.- ZAEAk, 2016ko azaroaren 11n, aipatutako txostenean zehaztutako kopuruak bidaltzea eskatu zion GFari.

4.- GFAk, 2019ko otsailaren 4an, atzera bota zituen 2012ko lehen hiruhilekoei dagozkien bidalketak, preskripzioa argudiatuta.

5.- ZAEAk, 2019ko martxoaren 29an, inhibititu zedila eskatu zion GFari; aldiz, eskumena berea zela berretsi zuen GFAk 2019ko apirilaren 16an.

6.- ZAEAk, 2019ko maiatzaren 16an, gatazka planteatu zuen Arbitraje Batzordean; 10/2019 espediente-zenbakia esleitu zitzaion, eta prozedura arruntaren bidez izapidetu da.

## **II. ZUZENBIDEKO OINARRIAK**

1.- Arbitraje Batzordearen eskumena

Arbitraje Batzordeak eskumena dauka gatazka hau ebazteko, Ekonomia Itunaren 66.Bat artikuluan xedatutakoaren arabera; artikulua horrek eginkizun hauek ezartzen baitizkio batzorde horri:

- «a) Estatuko Administrazioaren eta foru-aldundien artean edo foru-aldundien eta beste autonomia-erkidegoetako administrazioen artean sortzen diren gatazkak ebaztea, bai tributu itunduen lotuneen aplikazioari dagokionez, bai administrazio bakoitzari zenbateko zatia dagokion zehazteko, sozietateen gaineko zergaren edota balio erantsiaren gaineko zergaren baterako tributazioaren kasuetan.
- b) Banakako tributu-harremanetako arazo zehatzetan ekonomia-itun hau interpretatzeko eta aplikatzeko orduan administrazio interesdunen artean sor litezkeen gatazkak erabakitzea.
- c) Zergadunen egoitza dela-eta sor litezkeen desadostasunak ebaztea».

## 2.- Preskripzioa

Arbitraje Batzordeak 11/2014 Ebazpenean eta Auzitegi Gorenak 2015eko abenduaren 15eko, 2022ko otsailaren 10eko, 2020ko abenduaren 3ko, 2021eko urtarrilaren 28ko eta 2020ko maiatzaren 18ko epaietan (ECLI:ES:TS:2015:5337, ECLI:ES:TS:2022:596, ECLI:ES:TS:2020:4077, ECLI:ES:TS:2021:372 eta ECLI:ES:TS:2020:1010 epaiak, hurrenez hurren), irizpide konstante bat ezarri dute: administrazioen arteko eskubidea izaera publikoko aurrekontu-eskubidea dela, administrazioak zergadunaren aurrean duen zerga-eskubideaz bestelakoa; eta administrazioen arteko eskubidearen preskripzio-epea bidegabeko diru-sarrera egiten den unean hasten dela, eta ez dela eteten zergadunaren gaineko eskumenaren jabetzat jotzen den administrazioak (hirugarren bat izaten da administrazioen arteko harreman juridikoan) zerga-prozeduran egiten dituen jarduketan ondorioz.

Horiek horrela, Arbitraje Batzordeak honako hau

## ERABAKI DU

1.- Preskribatutzat jotzea Zerga Administrazioko Estatu Agentziaren Gipuzkoako Foru Aldundiarekiko administrazioen arteko kreditu publikorako eskubidea, zehazki, zerbitzuak lurralde erkidean eksklusiboki eman zituzten langileen 2012ko lehen hiru hiruhilekoetan egindako lan pertsonalaren gaineko atxikipenen bidalketa erreklamatzeko.

2.- Jakinaraztea honako erabaki hau Zerga Administrazioko Estatu Agentziari, Gipuzkoako Foru Aldundiari eta TTUSL sozietateari.